

Jualan borong, runcit cecah RM142.5b pada Ogos

Perdagangan borong dan runcit Malaysia mencatatkan nilai jualan berjumlah RM142.5 bilion, meningkat 6.7 peratus tahun ke tahun pada Ogos 2023, kata Jabatan Perangkaan Malaysia (DOSM).

Sementara itu, bagi perbandingan bulan ke bulan, nilai jualan meningkat dua peratus, katanya dalam satu kenyataan semalam.

Ketua Perangkawan Malaysia, Datuk Seri Dr Mohd Uzir Mahidin, berkata peningkatan 6.7 peratus tahun ke tahun bagi perdagangan borong dan runcit pada Ogos 2023 disumbangkan oleh subsektor perdagangan borong yang meningkat 6.2 peratus atau RM3.7 bilion kepada RM63.9 bilion.

"Perdagangan runcit juga berkembang 6.3 peratus atau RM3.6 bilion kepada RM60.5 bilion, di-

kuti oleh kenderaan bermotor dengan peningkatan 9.7 peratus atau RM1.6 bilion kepada RM18.1 bilion," katanya.

Selain itu, peningkatan dua peratus atau RM2.8 bilion berbanding bulan sebelum disumbangkan oleh kenderaan bermotor dengan kenaikan sebanyak RM1.2 bilion atau 7.1 peratus, manakala perdagangan runcit mencatatkan pertumbuhan positif sebanyak 1.4 peratus atau RM900 juta dalam tempoh yang sama.

Perdagangan borong pula mengembangkan 1.2 peratus atau RM800 juta berbanding bulan lalu, tambah beliau.

Bagi prestasi mengikut subsektor, Mohd Uzir berkata, pertumbuhan 6.2 peratus tahun ke tahun dalam subsektor perdagangan

borong disumbangkan oleh lain-lain pengkhususan jualan borong yang meningkat RM1.5 bilion atau 6.2 peratus kepada RM25 bilion.

Mengulas lanjut mengenai subsektor perdagangan runcit, beliau berkata, kenaikan 6.3 peratus tahun ke tahun pada bulan ini disokong oleh jualan runcit di kedai bukan pengkhususan yang meningkat 9.2 peratus atau RM1.9 bilion kepada RM23 bilion.

"Pertumbuhan tahun ke tahun sebanyak 9.7 peratus bagi subsektor kenderaan bermotor pada bulan Ogos dipacu oleh jualan komponen dan aksesori kenderaan bermotor yang melonjak 20.7 peratus atau RM800 juta untuk merekodkan RM4.7 bilion.

"Ini diikuti oleh jualan kenderaan bermotor (6.2 peratus) dan

penyelenggaraan dan pembaikan kenderaan bermotor (21.6 peratus)," katanya.

Bagi perbandingan bulanan, subsektor ini meningkat 7.1 peratus, didorong oleh jualan kenderaan bermotor (13.2 peratus), jualan komponen dan aksesori kenderaan bermotor (1.6 peratus) dan penyelenggaraan dan pembaikan kenderaan bermotor (1.8 peratus).

Beliau menambah, bagi indeks jualan runcit melalui internet, indeks ini merekodkan pertumbuhan 1 peratus tahun ke tahun pada Ogos 2023 berbanding 0.4 peratus pada Julai 2023.

Bagi nilai pelarasan musim, indeks ini menokok 3.9 peratus berbanding bulan sebelumnya.

BERNAMA